

民國文獻資料叢編

近代學報
彙刊



殷夢霞 李強 選編



國家圖書館出版社



殷夢霞、李強 選編

近代學報彙刊

第八十五冊

國家圖書館出版社

第八十五冊目錄

清華學報 第十二卷第二期	一九三七年四月		一
清華學報 第十二卷第三期	一九三七年七月		二〇三
清華學報 第十三卷第一期	一九四一年四月		四二七

清 華 學 報

第拾貳卷第二期

(每年四期)

民國廿六年四月

本期目錄

論文

- | | |
|-----------------|-----|
| 讀左傳小箋 | 楊樹達 |
| 論古無複輔音凡來母字古讀如泥母 | 唐 蘭 |
| 逍遙遊向郭義及支遁義探源 | 陳寅恪 |
| 宋初四川王小波李順之亂 | 張蔭麟 |
| 席勒麥森納歌舞隊與歐洲戲劇 | 陳 銓 |

書評

- | | |
|---|-----|
| Frei, <i>Monosyllabisme et Polysyllabisme dans les Emprunts Linguistiques, avec un Inventaire des Phonèmes de Pékin et de Tokio.</i> | 王 力 |
| Ashton, Hobson, Gray, Raphael, & others, <i>The Chinese Exhibition, A Commemorative Catalogue of International Exhibition of Chinese Arts, Nov. 1935—Mar. 1936.</i> | 唐 蘭 |
| Wells, <i>Experiment in Autobiography: Discoveries and Conclusions of a Very Ordinary Brain (Since 1866).</i> | 陳之邁 |
| 王繩祖, <i>歐洲近代史</i> | 沈 銓 |

國 立 清 華 大 學 出 版

國立清華大學
清華學報編輯部

朱自清(主任)

聞一多

陳銓

馮友蘭

雷海宗

潘光旦

蕭公權

國立清華大學
清 華 學 報

第十二卷 第二期

目 錄

民國二十六年四月

論文

- | | | |
|-----------------------|-----|-----|
| 讀左傳小箋 | 楊樹達 | 257 |
| 論古無複輔音凡來母字古讀如泥母 | 唐 蘭 | 297 |
| 逍遙遊向郭義及支遁義探源 | 陳寅恪 | 309 |
| 宋初四川王小波李順之亂(一失敗之均產運動) | 張蔭麟 | 315 |
| 席勒麥森納歌舞隊與歐洲戲劇 | 陳 銓 | 337 |

書評

- | | | |
|---|-----|-----|
| Frei, <i>Monosyllabisme et Polysyllabisme dans les Emprunts Linguistiques, avec un Inventaire des Phonèmes de Pékin et de Tokio.</i> | 王 力 | 403 |
| Ashton, Hobson, Gray, Raphael, & others, <i>The Chinese Exhibition, A Commemorative Catalogue of International Exhibition of Chinese Arts, Nov. 1935—Mar. 1936.</i> | 唐 蘭 | 417 |
| Wells, <i>Experiment in Autobiography: Discoveries and Conclusions of a Very Ordinary Brain (Since 1866).</i> | 陳之邁 | 419 |
| 王繩祖, <i>歐洲近代史</i> | 沈 鐸 | 426 |

附錄

- | | | |
|-------|-----|-----|
| 秦漢改月論 | 俞平伯 | 435 |
|-------|-----|-----|

讀左傳小箋

楊樹達

臣聞以德和民，不聞以亂。以亂，猶治絲而棼之也。 隱四年

集解云：絲見棼緼，益所以亂。

達按：棼說文訓複屋棟，非此義。棼當讀爲紛。廣雅釋詁云：紛，亂也。說文貝部云：貣，物數紛貣亂也。杜云棼緼，即說文之紛貣。

若寡人得沒于地，天其以禮悔禍于許，無盭茲許公復奉其社稷。 隱十一年

集解云：茲，此也。

達按：無盭此許公復奉其社稷，文義不合。竊謂：茲之爲言使也。古晉茲使同在咍部。無盭茲許公復奉其社稷，無盭使許公復奉其社稷也。昭元年云：勿使有所壅閉湫底以露其體，茲心不爽而昏亂百度，謂使心不爽而昏亂百度也。昭二十六年云：單旗劉狄之人帥羣不弔之人以行亂于王室，晉爲不道，是攝是贊，思肆其罔極，茲不穀震盪播越，竄在荆蠻，謂使不穀震盪播越竄在荆蠻也。下文云：無滋他族實偪處此，亦謂無使他族實偪處此也。滋與茲同。

禮以體政，政以正民。 桓二年

達按：禮體，政正，皆以聲爲訓。定十五年云：夫禮，死生存

亡之體也。亦以體訓禮。

鄭子元請爲左拒以當蔡人衛人。桓五年

集解云：拒，方陳。

達按：說文五篇上工部云：巨，規巨也。或作桀。經傳通作矩。矩所以爲方。杜蓋讀拒爲矩，故云方陳。

謂其不疾癢蠹也。桓六年

達按：傳文以普存釋博，碩大釋碩，不疾癢蠹釋肥，備肫釋肫。杜釋不疾癢蠹爲皮毛無疥癬，無疥癬者不必爲肥，杜釋自非傳意。說文疒部痲下云：小腫也。一曰族癢。族癢與癢蠹音近，然不詳許說究爲何義。今按：疾，病也。癢當讀爲瘦，蠹當讀爲羸。說文疒部云：瘦，羸也。羊部云：羸，瘦也。不疾癢蠹謂不病瘦羸，正肥之謂矣。癢瘦古音相近。（族聲之族玉篇音蘇走先奏二切，先奏切與瘦音同。）說文於部云：族，矢鏃也。束之族族也。詩魯頌泮水云：束矢其族。族按音義皆近。癢之爲瘦，猶族之爲按矣。蠹羸古音同。說文衣部云：羸，袒也。荀子賦篇賦蠹云：有物於此，僂僂兮其狀。楊注云：僂僂，無羽毛之貌。羸僂音義皆同。蠹之爲羸，猶僂之爲羸矣。

曹太子共有憂乎！非歎所也。桓九年

達按：昭二十八年云：諺曰：唯食忘憂。曹太子當食而歎，故云非歎所。

使其壻雍糾殺之。桓十五年

達按：爾雅釋親云：女子子之夫爲壻。說文士部壻訓夫，以左傳及爾雅衡之，於義爲不備，當云女夫也。

畢陶邁種德。莊八年

集解云：邁，勉也。

達按：說文邁訓遠行，傳文假邁爲勦。力部云：勦，勉力也。

初，公孫無知虐于雍廩。莊八年

集解云：爲殺無知傳。

九年春，雍廩殺無知。莊九年

達按：二傳當在九年爲一傳。凡記今事而追溯其始事，則云初。記初而無今事，獨爲一傳，非事理也。此依年分傳者妄分耳。杜於首條注云：爲殺無知傳。知杜所據本已誤分，而杜已不知其當爲一傳矣。

乘丘之役，公以金僕姑射南宮長萬，公右獸孫生搏之。宋人謂之。宋公斬之，曰：始吾敬子，今子，魯囚也，吾弗敬子矣。病之。

莊十一年

集解云：爲宋萬弑君傳。

十二年秋，宋萬弑閔公于蒙澤。莊十二年

達按：二傳當在十二年合爲一傳。取傳附經者誤析爾。

王與之武公之略，自虎牢以東。莊二十一年

集解云：略，界也。

達按：僖十五年云：略秦伯以河外列城五，東盡魏略，南及華山，內及解梁城。成二年云：兄弟甥舅侵敗王略。

鄭伯效尤，其亦將有咎。莊二十一年

達按：尤假爲訖。說文言部云：訖，罪也。文元年云：效尤，禍也。僖二十四年襄二十一年並云：尤而效之。定六年云：尤人而效之。尤並訖字之假。

征伐以討其不然。莊二十三年

集解云：不然，不用命。正義云：不朝不會，則征討之，故言

征伐以討其不然。

達按：杜釋不然爲不用命，乃以意爲釋，非然有用命之義也。愚按：然當讀爲懋。說文心部云：懋，敬也。不懋者，不敬也。宣十二年云：古者明王伐不敬。成二年云：淫湎毀常，王命伐之，則有獻捷，所以懋不敬，勸有功也。此伐不敬之事也。詩商頌長發篇云：不懋不疎。傳云不然，猶詩云不懋耳。說文然或作難，故然可假爲懋矣。

卜偃曰：畢萬之後必大。閔元年

集解云：卜偃，晉掌卜大夫。

達按：晉語一有郭偃，韋注云：晉大夫卜偃也。則偃姓郭氏。

狄人囚史華龍滑與禮孔以逐衛人。二人曰：我，大史也，實掌其祭。不先，國不可得也。閔二年

集解云：夷狄畏鬼，故恐言當先白神。

達按：史記殷本紀云：紂愈淫亂不止，大師少師乃持其祭樂器奔周，武王於是遂率諸侯伐紂，古人視祭祀關切於國家者如此。杜解殊陋。

尨奇無常。閔二年

集解云：雜色奇怪，非常之服。

達按：尨奇，尨謂偏衣之左右異色，奇即謂其偏，非謂其怪也。凡奇聲字皆有不偶偏側之義。說文可部云：奇，不耦。荀子天論篇云：畸則不可爲。注云：畸謂偏也。又解蔽篇云：倚其所私以觀異術。注云：倚，偏倚也。說文手部云：倚，偏引也。一切經音義七引倉頡篇云：畸，側齒也。

廣雅釋訓云：畸幅，傾側也。說文車部云：𨋖，車旁也。爾

雅釋畜云：角一俯一仰，齟。偏衣左右不耦，故謂之奇矣，豈奇怪之謂乎！

齊方勤我。僖三年

集解云：勤恤鄰難。

達按：傳云勤我，杜云勤恤鄰難，則增字以釋經矣。今按：爾雅釋詁云：勤，勞也。勤我者，爲我勤勞也。不當如杜說。僖二十四年云：求諸侯莫如勤王。勤王謂勤勞王事也。杜云勤納王，亦失之。成十八年云：欲求得人，必先勤之。勤之，謂爲之有所勤勞也。杜云勤恤其急，亦失之。

齊侯與蔡姬乘舟于圉，蕩公。公懼，變色。禁之，不可。公怒，歸之，未絕之也。蔡人嫁之。僖三年

集解云：爲明年齊伐蔡傳。

四年春，齊侯以諸侯之師伐蔡。僖四年

達按：二傳當在四年合爲一傳。

吾又不樂。僖四年

集解云：吾自理則姬死，姬死則君必不樂，不樂爲由吾也。

達按：不樂爲由吾，不得云吾又不樂。愚疑太子蓋謂：自理，則己可免於罪而姬必死。向令姬死之後，己能使君樂，猶之可也。而己不能令君樂，故不欲自理，使姬死而君不安耳。

以是藐諸孤。僖九年

達按：諸與者同。周語云：此羸者陽也。句例同。

辱在大夫，其若之何？僖九年

集解云：欲屈辱荀息，使保護之。

達按：獻公使荀息傅奚齊，乃獻公疾以前之事。此云辱

在大夫，即指爲傅之事而言。云其若之何者，獻公亦知奚齊非正嫡，豫慮其有變，問息將何以處之也。如杜解，則似獻公疾而後使荀息爲傅，與上下文乖忤不合矣。

入而能民，土於何有。 僖九年

集解云：能得民，不患無土。

達按：杜釋能民爲得民，是也。古相得謂之能，不相得謂之不能。僖十年云：蘇子叛王即狄，又不能於狄。文十六年云：不能其大夫，至於君祖母，以及國人，是也。時賂秦以河外列城五，故言不患無土。

孤雖歸，辱社稷矣。其卜貳圉也。 僖十五年

集解云：貳，代也。圉，惠公太子懷公。

達按：國語云：其改置以代圉，故杜釋貳爲代，其說非也。

今謂：圉爲太子，故謂之貳。國語晉語一云：夫太子，君之貳也，是其義也。

梁伯益其國而不能實也，命曰新里，秦取之。 僖十八年

十九年春，遂城而居之。 僖十九年

達按：二傳當在十九年爲一傳。

晉公子重耳之及於難也，……重耳敢不拜。 僖二十三年

二十四年春王正月，秦伯納之。 僖二十四年

達按：二傳當在二十四年爲一傳。今析爲二，秦伯納之一語爲無根矣。

懷與安，實敗名。 僖二十三年

達按：懷謂懷土。宣二年云：我之懷矣，杜注云：懷，戀也。

共用之謂勇。 文二年

達按：用勇以聲爲訓。

君子是以知秦穆公之爲君也，舉人之周也，與人之壹也。

孟明之臣也，其不解也，能懼思也。 文三年

達按：文本當云孟明之爲臣，承上秦穆公之爲君而省。

嬴曰：以剛。 文五年

達按：以與已同，甚也。宣十一年云：罰已重矣。成八年

云：城已惡。成十六年云：王卒以舊。以並與已同。

夷之蒐，……故箕鄭父先都士穀梁益耳，酈得作亂。 文八年

集解云：爲明年殺先克張本。

九年春王正月己酉，使賊殺先克。 文九年

達按：二傳當在九年合爲一傳。誤分之，則使賊殺先克無主名矣。

厥貉之會，麋子逃歸。 文十年

集解云：爲明年楚子伐麋傳。

十一年春，楚子伐麋。 文十一年

集解云：討前年逃厥貉會。

達按：二傳當在十一年爲一傳。若此類，皆所謂合之則雙美，離之則兩傷者也。

郕大子朱儒自安於夫鍾國人弗徇。 文十一年

集解云：爲明年郕伯來奔傳。

十二年春，郕伯卒，郕人立君。 文十二年

達按：二傳當在十二年爲一傳。分者見十二年字，遂誤析爾。

不有君子，其能國乎？國無陋矣。 文十二年

達按：國無陋與哀二年國無小義同。彼言鄭國雖小而有善射者，此言秦國雖辟陋在夷而有君子也。

時加羞珍異，無日不數於六卿之門。宣十六年

集解云：羞，進也。

達按：加當讀爲嘉。羞謂飲食，加羞猶言嘉肴矣。周禮大

宰云：四曰羞服之式。注云：羞，飲食之物也。

見叔牂，曰：子之馬然也？宣二年

集解云：華元見而慰之。

達按：杜說殊謬。華元不知羊斟之賣己而慰之，則爲愚；知之而慰之，則爲僞。皆非事理也。愚謂：也讀與邪同。

古人問詞恆用也。論語云：子張問：十世可知也？又云：井有仁焉，其從之也？皆其例也。蓋華元知羊斟之賣己，故婉其詞以詰之，謂子之馳入鄆師者，子之馬則然邪？

羊斟知華元之慍己，故既答而出奔也。合觀上下文，情事如繪，若如杜釋，則情事全乖矣。

于思于思，棄甲復來。宣二年

集解云：于思，多鬚之貌。

達按：詩盧令篇云：其人美且偲。釋文云：偲，多鬚貌。按思偲同，思爲多鬚貌，于爲助語詞。杜以于思連文立訓，似非。

諫而不入，則莫之繼也。宣二年

達按：入與納同。

君能有終，則社稷之固也，豈唯羣臣賴之？宣二年

達按：固當讀爲祐。爾雅釋詁云：祐，福也。固祐同從古聲，故得通用。襄二年云：吾子之請，諸侯之福也，豈惟寡君賴之。文義與此正同，可以證矣。

媾，吉人也。宣三年

達按：姑吉，聲訓。

遂殺洩冶。宣九年

達按：大戴禮保傳篇云：靈公殺泄冶而鄧元去陳。

事三旬而成，不愆於素。宣十一年

達按：哀元年云：夫屯晝夜九日，如子西之素。素，今言豫定計畫。

其君無日不討國人而訓之于民生之不易，禍至之無日，戒懼之不可以怠。宣十二年

集解云：于，曰也。

達按：杜於訓之句絕，訓于爲曰，似以與下文箴之曰民生在勤爲類。然曰字表直述語氣，故民生在勤文義完具。此文民生之不易，禍至之無日，戒懼之不可以怠，文義不完，乃轉述語氣。一無之字，一有之字，語氣迥不相同，非共類也。劉淇助字辨略卷一云：訓之于民生之不易，猶云：訓之以民生之不易。此說是也。下文云：在軍，無日不討軍實而申儆之于勝之不可保，紂之百克而卒無後，訓之以若敖蚡冒，筆路藍縷以啓山林。于亦以也，互文耳。訓之于民生之不易，禍至之無日，戒懼之不可怠者，訓之以民生之不易，禍至之無日，戒懼之不可怠也。在軍無日不討軍實而申儆之于勝之不可保，紂之百克而卒無後者，申儆之以勝之不可保，紂之百克而卒無後也。書盤庚上篇云：予告女于難，言予告女以難也。又下篇云：歷告爾百姓于朕志，謂歷告爾百姓以朕志也。又云：今我既羞告爾于朕志，謂羞告爾以朕志也。洛誥篇云：聽朕教汝于棗民彝，謂聽朕教汝以棗民彝也。君奭篇云：我